

四庫全書

經部

欽定四庫全書

周禮述註卷二十一

安溪李光坡撰

○大司寇之職掌建邦之三典以佐王刑邦國詰四方
註曰典灋也詰謹也書曰王耄荒度作詳刑以詰四
方 鄭剛中曰四方與邦國一耳言刑又言詰何也
諸侯之邦有不率者刑得而加之至四方之遠殊俗
異域或羈縻而處之或不得而盡臣之於其不率詰

責之有文告之辭詰之不改然後臨以甲兵之大刑
一曰刑新國用輕典

註曰新國者新辟地立君之國用輕灋者為其民未
習於教

二曰刑平國用中典

註曰平國者承平守成之國也用中典者常行之灋

三曰刑亂國用重典

註曰亂國篡弑叛逆之國用重典者以其化惡伐滅

之王介甫曰用輕典以柔乂之用中典以正直乂之用重典以剛乂之書曰惟敬五刑以成三德

以五刑糾萬民

註曰刑亦灋也糾猶察異之疏曰此五刑與尋常正五刑墨劓之等別刑亦灋也此五灋者或一刑之中而含五或此五刑全不入五刑者

一曰野刑上功糾力

註曰功農功力勤力

二曰軍刑上命糾守

註曰命將命也守不失部伍

三曰鄉刑上德糾孝

註曰德六德也善父母為孝

四曰官刑上能糾職

註曰能能其事也職職事修理

五曰國刑上愿糾暴

註曰愿慤慎也暴當為恭字之誤也 坡謂五者之

序自遂而鄉自鄉而官而國由外以至內王氏曰鄉
遂之間官軍所在故軍刑間於鄉遂之中 愿音願
暴註作恭慤苦角反

以園土聚教罷民

註曰園土獄城也聚罷民其中困苦以教之為善也
民不慤作勞有似於罷

凡害人者寘之園土而施職事焉以明刑恥之

註曰害人謂為邪惡已有過失麗於灋者以其不故

犯灋寘之圜土繫教之庶其困悔而能改也寘置也
施職事以所能役使之明刑書其罪過於大方版著
其背

其能改者反于國中不齒三年

註曰反於國中謂舍之還於故鄉里也司圜職曰上
罪三年而舍中罪二年而舍下罪一年而舍不齒者
不得以年次列於平民

其不能改而出圜土者殺

註曰出謂逃亡 罷音皮寘之豉反著丁略反

以兩造禁民訟入束矢於朝然後聽之

註曰訟謂以財貨相告者造至也使訟者兩至既兩至使入束矢乃治之也不至不入束矢則是自服不直者也必入矢者取其直也詩曰其直如矢古者一弓百矢束矢其百个與 疏曰此并下二經論禁民獄訟不使虛誣之事言禁者謂令先入束矢不實則沒入官若不入則是自服不直是禁民省事之灋也

以兩劑禁民獄入鈞金三日乃致于朝然後聽之

註曰獄謂相告以罪名者劑今券書也使獄者各齎券書既兩券書使入鈞金又三日乃治之重刑也不券書不入金則是亦自服不直者也必入金者取其堅也三十斤曰鈞造七報反劑子隨反

以嘉石平罷民

註曰嘉石文石也樹之外朝門左平成也成之使善疏曰嘉善也有文乃稱嘉欲使罷民思其文理以

改悔自脩

凡萬民之有罪過而未麗於灋而害於州里者桎梏而坐諸嘉石役諸司空重罪旬有三日坐幕役其次九日坐九月役其次七日坐七月役其次五日坐五月役其下罪三日坐三月役使州里任之則宥而舍之

註曰有罪過謂邪惡之人所罪過者也麗附也未附於灋未著於灋也木在足曰桎在手曰梏役諸司空坐日訖使給百工之役也役月訖使其州里之人任

之乃赦之宥寬也 坡謂上文以五刑糾萬民恐民
有不服教以速於戾故于其將然而戒禁之過大內
於園土過小平以嘉石夫秋官諸職所列刑戮之事
為類至多大司寇獨舉此二端者蓋辟以止辟莫善
此也兩造兩劑以聽凡民曲直之情與園土皆獄事
也下文肺石以聽窮民冤怨之辭與嘉石皆外朝事
也 著直畧反內音納

以肺石達窮民

註曰肺石赤石也窮民天民之窮而無告者

凡遠近惇獨老幼之欲有復於上而其長弗達者立於肺石三日士聽其辭以告於上而罪其長

註曰無兄弟曰惇無子孫曰獨復猶報也上謂王與六卿也報之者若上書詣公府言事矣長謂諸侯若鄉遂大夫鄭剛中曰路鼓以待達窮者掌於大僕大僕政官也肺石達窮民掌於司寇司寇刑官也窮民之擊鼓者豈以政之不善之故而坐肺石者無乃

以刑之冤枉歟先儒以為窮民先在肺石朝士達之
乃得擊鼓奚為哉 肺芳廢反憊音瓊長丁丈反
正月之吉始和布刑于邦國都鄙乃縣刑象之灋于象
魏使萬民觀刑象挾日而斂之

王光遠曰先王之灋若江河貴乎易避而難犯使民
觀象者凡使之知所避而已 縣音懸易以豉反
凡邦之大盟約涖其盟書而登之于天府

註曰涖臨也天府祖廟之藏 疏曰大盟約者謂王

與諸侯因大會同而與盟有約誓之辭

大史內史司會及六官皆受其貳而藏之

註曰六官六卿之官也貳副也會古外反

凡諸侯之獄訟以邦典定之凡卿大夫之獄訟以邦灋斷之凡庶民之獄訟以邦成弊之

劉迎曰邦典有輕中重三典以定其罪邦灋八辟之麗邦灋有議親議故議賢之不同所以斷其罪邦成蓋有邦均邦賊邦諜之不同以此八成弊萬民之罪

非豕宰之六典八灋八成者也 乃上灼反諫音牒

大祭祀奉犬牲

疏曰犬屬西方金故司寇進之

○若禋祀五帝則戒之日涖誓百官戒于百族

註曰戒之日卜之日也百族謂府史以下也郊特牲

曰卜之日王立于澤親聽誓命受教諫之義也獻命

庫門之內戒百官也大廟之內戒百姓也 疏曰誓

百官太宰掌之餘小官誓之司寇臨之也戒于百族

大司寇親之

○及納亨前王祭之日亦如之

註曰納亨致牲 疏曰納亨將祭之辰祭之日旦明也

○奉其明水火

註曰明水火所取於日月者 疏曰奉此水火者水以配鬱鬯與五齊火以給爨烹也 王光遠曰書曰明清于單辭此亦刑官明清之事 亨普庚反齊才

細反

凡朝覲會同前王大喪亦如之

註曰大喪所前或嗣王

大軍旅涖戮于社

註曰社謂社主在軍者也

凡邦之大事使其屬蹕

註曰屬士師以下也蹕止行也 王介甫曰小司寇

國之大事使其屬蹕則事在國中而已大司寇寇邦之

大事使其屬蹕則事之所在通國野焉

○小司寇之職掌外朝之政以致萬民而詢焉一曰詢國危二曰詢國遷三曰詢立君

註曰外朝朝在雉門之外者也國危謂有兵寇之難國遷謂徙都改邑也立君謂無冢適選于庶也鄭司農云致萬民聚萬民也詢謀也詩曰詢于芻蕘書曰謀及庶人疏曰外朝在雉門之外則亦在庫門之外也案下文羣吏並在內而此經獨云致萬民者但

羣吏在朝是常萬民不合在朝惟在大事及疑獄乃致之故特言之也

○其位王南鄉三公及州長百姓北面羣臣西面羣吏東面

註曰羣臣卿大夫士也羣吏府史也其孤不見者孤從羣臣鄉大夫在公後

○小司寇擯以叙進而問焉以衆輔志而弊謀

註曰擯謂揖之使前也叙更也輔志者尊王賢明也

王介甫曰以王志為主而輔之以衆以衆謀為稽
而弊之于王 鄉許亮反長丁丈反難乃旦反適丁
歷反

以五刑聽萬民之獄訟附于刑用情訊之至于旬乃弊
之讀書則用灋

註曰附猶著也訊言也用情理言之冀有可以出之
者十日乃斷之王制曰刑者例也例者成也一成而
不可變故君子盡心焉鄭司農云讀書則用灋如今

時讀鞫已乃論之 疏曰讀書則用灋者謂行刑之時當讀刑書罪狀則用灋刑之

○凡命夫命婦不躬坐獄訟

註曰為治獄吏褻尊者也躬身也不身坐者必使其屬若子弟也喪服傳曰命夫者其男子之為大夫者命婦者其婦人之為大夫妻者春秋傳曰衛侯與元咺訟甯武子為輔鍼嚴子為坐士榮為大理

○凡王之同族有罪不即市

註曰鄭司農云刑諸甸師氏禮記曰刑于隱者不與
國人慮兄弟 咺况阮反鉞其廉反

以五聲聽獄訟求民情

疏曰案下五事惟辭聽一是聲而以五聲目之者四
事雖不是聲亦以聲為本故也案呂刑云惟貌有稽
在獄定之後則此五聽亦在要辭定訖恐其濫失更
以五聽觀之以求民情也

一曰辭聽

註曰觀其出言不直則煩

疏曰直則言要理深虛

則辭煩義寡

二曰色聽

註曰觀其顏色不直則赧然

三曰氣聽

註曰觀其氣息不直則喘

四曰耳聽

註曰觀其聽聆不直則惑

五曰目聽

註曰觀其眸子視不直則眊然 項平甫曰心者形之君辭者心之聲聲發於中不能掩於外其辭信則色定氣舒耳目不亂其辭偽則色變氣索耳目皆惑以此聽之人焉廋哉

以八辟麗邦灋附刑罰

註曰辟灋也杜子春讀麗為羅玄謂麗附也易曰日月麗乎天附猶著也 疏曰案曲禮云刑不上大夫

鄭註云其犯灋則在八議輕重不在刑書若然此八辟為不在刑書若有罪當議議得其罪乃附邦灋而附于刑罰也 坡謂此承命夫命婦及王之同姓有罪而言亦是獄定之後以此八辟附於邦灋而議之然後加以刑罰之所當施

一曰議親之辟

註曰鄭司農云若今時宗室有罪先請是也

二曰議故之辟

註曰故謂舊知也鄭司農云故舊不遺則民不偷

三曰議賢之辟

註曰鄭司農云若今時廉吏有罪先請是也玄謂賢有德行者

四曰議能之辟

註曰能謂有道藝者春秋傳曰夫謀而鮮過惠訓不倦者叔向有焉社稷之固也猶將十世宥之以勸能者今壹不免其身以棄社稷不亦惑乎

五曰議功之辟

註曰謂有大勲力立功者

六曰議貴之辟

註曰鄭司農云若今時吏墨綬有罪先請是也

七曰議勤之辟

註曰謂憔悴以事國 疏曰自此已上七者雖以王

為主諸侯一國之尊賞罰自制亦應有此議灋是以

議能鄭引叔向之事是其一隅也惟八曰議賓惟據

王者而言不及諸侯也

八曰議賓之辟

註曰謂所不臣者三恪二代之後歟 坡謂議親議
故親親也議賢議能崇德也議功報功也議貴謂其
近於賢能也議勤謂其近於功也議賓謂其近於親
故 辟音璧

以三刺斷庶民獄訟之中

註曰中謂罪正所定 疏曰三刺之言當是罪定斷

訖乃向外朝始行三刺庶民已上皆應有刺直言庶民者庶民賤恐不刺賤者尚刺已上刺可知 鄭剛中曰凡言刺有二義刺取也殺也如春秋刺公子偃之刺則刺者殺也此云三刺則有探取之義

一曰訊羣臣二曰訊羣吏三曰訊萬民

註曰刺殺也三訊罪定則殺之訊言也 疏曰所刺不必是殺餘四刑亦當三刺是以下文云上服下服是兼輕重皆刺也

○聽民之所刺宥以施上服下服之刑

註曰宥寬也民言殺殺之言寬寬之

鄭剛中曰上

服服上刑也下服服下刑也

坡謂自以五刑至此

四節首言用情訊之貴有以得其理灋之宜也次以

五聲求民情恐理灋雖似而察其容貌辭氣或有濫

失則情狀微曖更當求之蓋深於訊矣然猶未可遂

斷也必三刺而後施刑焉則以一時雖有罪戾而素

行或未足以滅身天罰不極遽施刑殺亦傷和氣也

然亦非全宥之也特服上刑服下刑因民所刺宥而輕重施之爾用情求情致其哀也三刺致其敬也故曰哀敬折獄也八辟以議親故之等所以優於凡民則又不徒三刺而已刺七賜反斷丁亂反

及大比登民數自生齒以上登于天府

註曰大比三年大數民之衆寡也人生齒而體備男八月而生齒女七月而生齒

○內史司會冢宰貳之以制國用

疏曰得民數乃制國用以其國用出於民故也 比
必里反註同

小祭祀奉犬牲凡禋祀五帝實鑊水納亨亦如之

註曰納亨致牲也其時鑊水當以洗解牲體肉 鑊

戶郭反

大賓客前王而辟

註曰鄭司農云小司寇為王道辟除姦人也 疏曰

此為王辟亦謂於宮中饗燕在寢及廟時也

后世子之喪亦如之

疏曰謂后世子之喪當朝廟之時王出入亦為之辟也 辟婢亦反

小師泣戮

註曰小師王不自出之師

凡國之大事使其屬蹕

註曰屬士師以下 疏曰國之大事即士師云諸侯為賓是也

孟冬祀司民獻民數於王王拜受之以圖國用而進退之

註曰司民星名謂軒轅角也小司寇於祀司民而獻民數於王重民也進退猶損益也國用民衆則益民寡則損坡謂孟冬獻民數者蓋一年之內或民氣安樂或值凶饑妖孽之疾因民之登耗可知生斂之豐匱有豐匱則知所入之多少以之圖度國用量入以為出也曰上文又云大比制國用何也曰三年矣

天道凶豐之數至此齊矣公私出入之經上下可較量矣民之少者則已壯未老者則及老矣故大比之而凡受田歸田之令或征或舍之差耕三餘一之灋民數有稽則國用可制也圖者隨分而營度制者總成而經畫義各有指焉曰上既大比何此方言歲獻曰此以孟冬獻與下文歲終正歲為類而連之無別義也曰司寇刑官也何以職民數曰未有以必其然也或者以寓好生之德乎抑又聞之古者悼與耄不

加刑而此經亦有赦幼弱赦老旄及七十與未齔者
不為奴之灋或者刑罰之下當知老幼以為刺宥有
取此義而屬之乎

○歲終則令羣士計獄弊訟登中于天府

註曰上其所斷獄訟之數 疏曰羣士謂鄉士遂士
以下皆是必登斷獄之書於祖廟天府者重其斷刑
使神監之 齔音襯

正歲帥其屬而觀形象令以木鐸曰不用灋者國有常

刑令羣士

坡謂令羣士三字疑衍文

○乃宣布于四方憲刑禁

註曰宣徧也憲表也謂縣之也刑禁士師之五禁
疏曰此布憲職也此官主之彼乃布之事相成也

○乃命其屬入會乃致事

註曰得其屬之計乃令致之于王 坡謂此九字當
在登中于天府之下正歲之上蓋小宰小司徒文皆

言攷成受會致事方繼以正歲帥屬云云可見矣

憲音懸註縣同會古外反

○士師之職掌國之五禁之灋以左右刑罰一曰宮禁
二曰官禁三曰國禁四曰野禁五曰軍禁皆以木鐸徇
之于朝書而縣于門閭

註曰左右助也助刑罰者助其禁民為非也宮王宮
也官官府也國城中也古之禁書亡矣今宮門有符
籍官府有無故擅入城門有離載下帷野有田律軍

有囂謹夜行之禁其猶可言者 疏曰凡設五刑者
刑期于無刑以刑止刑以殺止殺殺一人使萬人懲
是欲不使犯罪今於刑外豫施禁禁民使不犯罪是
左右助刑罰無使罪麗於民也 鄭剛中曰徇于朝
示貴者巷門曰閭縣于門閭示賤者 縣音懸猶音
粗

以五戒先後刑罰毋使罪麗于民一曰誓用之于軍旅
二曰誥用之于會同三曰禁用諸田役四曰糾用諸國

中五曰憲用諸都鄙

註曰先後猶左右也誓誥於書則甘誓湯誓大誥康誥之屬禁則軍禮曰無干車無自後射此其類也糾憲未有聞焉 坡謂禁是平日所遵守者使之畏戢而不為戒則一時所當行者使之知信而從命如軍禁不過各守部署若誓軍旅則更有步伐止齊是其一隅也 射食亦反

掌鄉合州黨族間比之聯與其民人之什伍使之相安

相受以比追胥之事以施刑罰慶賞

註曰鄉合鄉所合也追追寇也胥讀如宿胥之胥胥謂司搏盜賊也疏曰士師掌鄉中合聚之灋者以爲有施刑賞也州黨族閭比之聯即是鄉合之事與其民人之什伍者五家爲比比即一伍也二伍爲什據追胥之時坡謂掌其聯者使之相安相受也掌其什伍者以比追胥之事也以施刑罰慶賞總言之夫上五禁五戒自宮中府中以至國野都鄙獨不及

鄉至此方言鄉者蓋六鄉多重教事明刑所以弼教
故特出而詳之與 比毗志反下比追之比如字

掌官中之政令

註曰大司寇之官府中也 劉執中曰官中政令謂
秋官之屬所行政令

○察獄訟之辭以詔司寇斷獄弊訟致邦令

疏曰獄訟辭訴各有司存謂若鄉士遂士縣士方士
各主當司之獄訟其有不決來問都頭士師者則士

師審察以告大司寇斷獄弊訟也致邦令者此即所
察獄訟斷訖致與本官鄉士之等謂之致邦令也

掌士之八成

註曰鄭司農云八成者行事有八篇若今時決事比
疏曰士即士師以下

一曰邦汙

註曰鄭司農云汙讀如酌酒尊中之酌國汙者斟汙
盜取國家密事若今時刺探尚書事

二曰邦賊

註曰為逆亂者

三曰邦諜

註曰為異國反間 疏曰異國欲來侵伐先遣人往間候取其委曲反來說之其言諜諜然故謂之邦諜

四曰犯邦令

註曰干冒王教令者

五曰撓邦令

註曰稱詐以有為者

六曰為邦盜

註曰竊取國之寶藏者

七曰為邦朋

註曰朋黨相阿使政不平者

八曰為邦誣

註曰誣罔君臣使事失實 坡謂此言斷獄弊訟其

成式有此八品也邦汙邦賊邦諜悖逆作亂之事也

犯邦令橋邦令為邦盜罔上行私之事也邦朋比黨
為姦逆亂之階也邦誣者誣罔造妖以惑衆私罔之
漸也 橋音矯比必利反間去聲冒音墨藏才浪反
若邦凶荒則以荒辨之癘治之

劉迎曰荒辨之癘所以別其荒歲之輕重而知其中
年凶年無年欲為移民通財糾守緩刑之備使凶札
而無辨安知食二鬴與不能人二鬴者哉上饑則發
上年之粟中饑則發中年之粟下饑則發下年之粟

未必不自荒辨之灋知之先儒既以辨為別又改為
貶而援刑貶為證則荒辨豈特緩刑之一乎 劉執
中曰不辨其荒而槩施救政則僥倖之民出矣故士
師治以荒辨之灋

○令移民通財糾守緩刑

註曰移民就賤救困也通財補不足也糾守備盜賊
也緩刑舒民心也 脯音脯

凡以財獄訟者正之以傳別約劑

註曰傳別中別手書也約劑各所持券也鄭司農云
若今時市買為券書以別之各得其一訟則案以券
正之 鄭剛中曰稱責之財則傳之以約束別而為
兩人執其一買賣之財則立為限約而有劑券以身
執故以財致訟者操此以為決

若祭勝國之社稷則為之尸

註曰以刑官為尸畧之也周謂亡殷之社為亳社
易彥祥曰亳社以陰為主而刑乃陰之類媒氏以男

女之陰訟而聽於勝國之社類也此祭勝國之社而
刑官為之尸亦類也

王燕出入則前驅而辟

註曰道王且辟行人 疏曰言燕出入謂宮苑皆是

道音導

祀五帝則沃尸及王盥洎鑊水

註曰洎謂增其沃汁 疏曰案特牲少牢尸尊不就
洗入門北面則以盤匱盥手王盥謂將獻尸時先就

洗盥鑊水亨人實之此官增之示敬而已此直言祀
五帝沃尸及王盥其餘冬至夏至及祭先王先公所
沃盥者案小祝職云大祭祀沃尸盥小臣職云大祭
祀沃王盥如是則冬至夏至及先王先公小祝沃尸
盥小臣沃王盥鬱人云凡裸事沃盥惟在宗廟為裸
時洎其器反匱音移亨普庚反

凡刲珥則奉犬牲

註曰珥讀為珥刲珥釁禮之事用牲毛者曰刲羽者

曰𧈧 𧈧音機珥而志反註𧈧同

諸侯為賓則帥其屬而蹕于王宮

註曰謂諸侯來朝若燕饗時

大喪亦如之

大師帥其屬而禁逆軍旅者與犯師禁者而戮之

註曰逆軍旅反將命也犯師禁干行陳也 行戶剛

反陳直忍反

歲終則令正會正歲帥其屬而憲禁令于國及郊野

註曰去國百里為郊郊外謂之野

坡謂春官大祝云大禋祀祭亦逆牲逆尸是天地有尸也五帝有尸則具於此文坡疑天地至大何人精氣道德可與之準而代為歆享乎竊謂郊以五稷配所云尸者或為稷尸至祀五天帝則配以五人帝是此尸當亦人帝之尸如大皞則尸風氏之類也然或古者祭必立尸雖天地不廢則準以王父孫尸之義當以天子為尸存此二說蓋疑而不

敢質言今案曲禮孫可以為王父尸經下孔疏云
異義公羊說祭天無尸左氏說晉祀夏郊以董伯
為尸虞夏傳云舜入唐郊以丹朱為尸是祭天有
尸也許慎引魯郊祀曰祝延帝尸從左氏之說也
又案橫渠張子曰節服氏言郊祀送逆尸從車則
祀天有尸也天地山川之類非人鬼者恐皆難有
尸節服氏言郊祀有尸不害后稷配天而有尸也
是此二說先儒已有明論獨恨區區寡陋耳然以

理求之則張子為長夫舜入唐郊丹朱為尸以為
天尸似矣而有虞氏禘黃帝而郊嚳丹朱嚳孫也
安知非舜入唐郊祀天配嚳以其孫丹朱為其王
父帝嚳尸乎此張子之可據一也晉祀夏郊董伯
為尸韋氏註云神不散非類董伯或姒姓者則韋
氏不以董伯為天尸而以為鯀尸又彰然矣此張
子之可據二也然亦有疑本經神亦五帝言尸至
為何尸皆不著別則未知其天與人與可疑一也

此經祭勝國社稷士師為尸夫勝國社稷有尸則社稷亦當有之五祀有尸則朱子常著之矣社稷五祀有尸則獄瀆亦當有之周公祭泰山以大公為尸是也祭百物如迎貓迎虎之類皆有尸則祭四方亦當有之自社稷至百物皆地祭也而皆有尸則天神亦當有之可疑二也故孔疏又云天子祭天地社稷山川四方百物及七祖之屬皆有尸也諸侯祭社稷竟內山川及大夫有采地祭五祀

皆有尸也外神之屬不問同姓異姓但卜吉則可
為尸由此觀之張子雖長於理抑孔疏亦斷置於
經者若張子曰天地山川之類非人鬼難有尸則
社稷五祀亦非人鬼而何以有尸坡從子鍾倫云
貓虎有尸貓虎豈死而鬼者嗚呼三代之制遠矣
微矣外史雜篇苟可徵者猶將取焉况諸賢之所
稽其理與事昭昭有是乎不敢妄有折衷在賢者
之裁之也

○鄉士掌國中

註曰鄭司農云謂國中至百里郊也玄謂其地則距王城百里內也言掌國中此主國中獄也六鄉之獄在國中

各掌其鄉之民數而糾戒之

註曰鄉士八人言各者四人而分主三鄉 黃文叔曰糾戒之恐其昏迷抵誤而陷於灋也

聽其獄訟察其辭辨其獄訟異其死刑之罪而要之旬

而職聽于朝

註曰辨異謂殊其文書也要之為其罪濫之要辭如今劾矣十日乃以職事治之于外朝容其自反覆疏曰劾實也正謂棄虛從實收取要辭為定容其自反覆恐囚虛承其罪十日不翻即是其實然後向外朝對衆更詢乃與之罪坡謂職多也莊子曰萬物職職職聽言諸獄官衆聽之也

○司寇聽之斷其獄弊其訟于朝羣士司刑皆在各麗

其灋以議獄訟

註曰麗附也各附致其灋以成議也 疏曰呂刑之書聽五辭是也恐專有濫故衆獄官共聽之各麗其灋者罪狀不同附灋有異當如其罪狀各依其罪不得濫出濫入

○獄訟成士師受中協日刑殺肆之三日

註曰受中謂受獄訟之成也鄭司農云士師受中若今二千石受其獄也中者刑罰之中也故論語曰刑

罰不中則民無所措手足協日刑殺協合也和也和合支幹善日若今時望後利日也肆之三日故春秋傳曰三日棄疾請尸論語曰肆諸市朝玄謂士師既受獄訟之成鄉士則擇可刑殺之日至其時而往泣之尸之三日乃反也疏曰肆之三日據死者而言其四刑之類刑訖即放不須肆之

○若欲免之則王會其期

註曰免猶赦也期謂鄉士職聽于朝司寇聽之日王

欲赦之則用此時親往議之 坡謂所欲免者親故
之等在於八議也 不中丁仲反

大祭祀大喪紀大軍旅大賓客則各掌其鄉之禁令帥
其屬夾道而蹕

註曰屬中士以下 疏曰大祭祀若祭天四時迎氣
即於四郊大喪紀當葬所經道大軍旅王出行所經
過大賓客四方諸侯來朝各由方而入並過六鄉路
以是故各掌其鄉之禁令

三公若有邦事則為之前驅而辟其喪亦如之

註曰鄭司農云鄉士為三公道也若今時三公出城郡督郵道也

凡國有大事則戮其犯命者

疏曰大事言戮犯命者止謂征伐田獵之大事故有戮犯命之事也

○遂士掌四郊

註曰鄭司農云謂百里外至三百里也玄謂其地則

距王城百里以外至二百里言掌四郊者此主四郊
獄也六遂之獄在四郊

各掌其遂之民數而糾其戒令

註曰遂士十二人言各者二人而分主一遂

聽其獄訟察其辭辨其獄訟異其死刑之罪而要之二
旬而職聽于朝

疏曰去王城漸遠恐多枉濫故至二旬容其反覆也
○司寇聽之斷其獄弊其訟于朝羣士司刑皆在各麗

其灋以議獄訟獄訟成士師受中協日就郊而刑殺各於其遂肆之三日

註曰就郊而刑殺者遂士也遂士擇刑殺日至其時往蒞之如鄉士為之矣言各於其遂者四郊六遂遂處不同 疏曰鄉士獄在國中不須言就此去郊差遠故云就郊也六鄉之獄并在國中不得言各六遂之獄分在四郊之上故須言各也

○若欲免之則王令三公會其期

註曰令猶命也王欲赦之則用遂士職聽之時命三公往議之

若邦有大事聚衆庶則各掌其遂之禁令帥其屬而蹕黃文叔曰大事即大祭祀大喪紀大軍旅大賓客也鄉舉其目遂舉其凡不必言王所親也邦之大事遂未必盡與政令及之則聚其衆庶遂士掌其禁令六鄉若有邦事則為之前驅而辟其喪亦如之

疏曰六鄉近則使三公六遂差遠使六鄉

凡郊有大事則戮其犯命者

黃文叔曰其事在郊有犯命者遂士專戮之遂獄在郊也

○縣士掌野

註曰鄭司農云掌三百里至四百里大夫所食晉韓須為公族大夫食縣玄謂地距王城二百里以外至三百里曰野三百里以外至四百里曰縣四百里以外至五百里曰都都縣野之地其邑非王子弟公卿

大夫之采地則皆公邑也。謂之縣。縣士掌其獄焉。言掌野者。郊外曰野。大總言之也。獄居近野之縣獄在二百里上。縣之縣獄在三百里上。都之縣獄在四百里上。

各掌其縣之民數

疏曰。序官縣士三十二人。縣獄既有三處。蓋三百里地狹人少。當十人。四百里五百里地廣民多。當各十人。故云各掌。

糾其戒令而聽其獄訟察其辭辨其獄訟異其死刑之罪而要之三旬而職聽于朝司寇聽之斷其獄弊其訟于朝羣士司刑皆在各麗其灋以議獄訟獄訟成士師受中協日刑殺各就其縣肆之三
日

註曰刑殺各就其縣者亦謂縣士也

若欲免之則王命六鄉會其期

若邦有大役聚衆庶則各掌其縣之禁令

疏曰直言大役不言大事又不言率其屬而蹕者則非王行征伐之事謂起人役役使民衆故直各掌其縣之禁令而已

若大夫有邦事則為之前驅而辟其喪亦如之凡野有大事則戮其犯命者

註曰野距王城二百里以外及縣都

○方士掌都家

註曰鄭司農云掌四百里至五百里公所食魯季氏

食於都玄謂都王子弟及公卿之采地家大夫之采地大都在疆地小都在縣地家邑在稍地不言掌其民數民不純屬王疏曰上縣士掌三等公邑之獄此方士掌三等采地之獄縣士所掌是親自掌之若方士乃遙掌之蓋采地自有都家之士掌獄有事則上於方士疆居良反

聽其獄訟之辭辨其死刑之罪而要之三月而上獄訟于國

註曰三月乃上要者又變朝言國以其自有君異之
○司寇聽其成于朝羣士司刑皆在各麗其灋以議獄
訟

註曰成平也鄭司農說以春秋傳曰晉邢侯與雍子
爭鄩田久而無成 疏曰上三處直言司寇聽之此
獨云聽其成者成謂采地之士所平斷文書亦異於
上也

○獄訟成士師受中書其刑殺之成與其聽獄訟者

註曰都家之吏自協日刑殺但書其成與治獄之吏
姓名備反覆有失實者 疏曰書之者亦是自有君
異於鄉士之等 鄙許六反

凡都家之大事聚衆庶則各掌其方之禁令

註曰方士十六人言各掌其方者四人而主一方也
其方以王之事動衆則為班禁令焉

以時脩其縣灋若歲終則省之而誅賞焉

註曰縣灋縣師之職也其職掌邦國都鄙稍甸郊野

之地域而辨其夫家人民田萊之數及其六畜車輦
之稽方士以四時脩此灋歲終又省之則與掌民數
亦相近

凡都家之士所上治則主之

註曰都家之士都士家士也主之告於司寇聽平之

黃文叔曰所上治者罪與灋疑而讞者也 讞魚

竭反

○訝士掌四方之獄訟

註曰鄭司農云四方諸侯之獄訟

○諭罪刑于邦國

註曰告曉以麗罪及制刑之本意

○凡四方之有治於士者造焉

註曰謂讞疑辨事先來詣乃通之於士也士主謂士
士師也如今郡國亦時遣主者吏詣廷尉議者

○四方有亂獄則往而成之

註曰亂獄謂若君臣宣淫上下相虐者也往而成之

猶呂步舒使治淮南獄 造七報反

邦有賓客則與行人送逆之入於國則為之前驅而辟
野亦如之居館則帥其屬而為之蹕誅戮暴客者客出
入則道之有治則贊之

註曰送逆謂始來及去也出入謂朝覲於王時也春
秋傳曰晉侯受策以出出入三覲入國入野自以時
事 道音導

凡邦之大事聚衆庶則讀其誓禁

疏曰大事者自是在國征伐之等聚衆庶非諸侯之事也

○朝士掌建邦外朝之灋左九棘孤卿大夫位焉羣士在其後右九棘公侯伯子男位焉羣吏在其後面三槐三公位焉州長衆庶在其後左嘉石平罷民焉右肺石達窮民焉

註曰樹棘以為位者取其赤心而外刺象以赤心三刺也槐之言懷也懷來人於此欲與之謀羣吏謂府

史也州長鄉遂之官鄭司農云王有五門外曰臯門
二曰雉門三曰庫門四曰應門五曰路門路門一曰
畢門外朝在路門外內朝在路門內左九棘右九棘
故易曰繫用徽纆寘于叢棘玄謂明堂位說魯公宮
曰庫門天子臯門雉門天子應門言魯用天子之禮
所名曰庫門者如天子臯門所名曰雉門者如天子
應門此名制二兼四則魯無臯門應門矣檀弓曰魯
莊公之喪既葬而經不入庫門言其除喪而反由外

來是庫門在雉門外必矣如是王五門雉門為中門
雉門外設兩觀與今之宮門同閤人幾出入者窮民
蓋不得入也郊特牲釋之於庫門內言遠當於廟門
廟在庫門之內見於此矣小宗伯職曰建國之神位
右社稷左宗廟然則外朝在庫門之外臯門之內與
今司徒府有天子以下大會殿亦古之外朝哉周天
子諸侯皆有三朝外朝一內朝二內朝之在路門內
者或謂之燕朝

帥其屬而以鞭呼趨且辟

註曰趨朝辟行人執鞭以威之

○禁慢朝錯立族談者

註曰慢朝謂臨朝不肅敬也錯立族談違其位傳語也
易彥祥曰王朝有三皆所以聽政此言外朝之
政特詳於治朝燕朝蓋不特諸侯羣臣之咸在雖州
長衆庶與夫窮民罷民之類皆得羣至於左右前後
之列其可忽乎朝士以鞭呼趨則呼朝者之趨於位

也且為之辟則使人避焉而止其位也位定然後為之禁其慢朝者錯立者族談者尊君故也 長丁丈反罷音皮辟音闢纏亡北反傳子損反

凡得獲貨賄人民六畜者委于朝告于士旬而舉之大者公之小者庶民私之

註曰俘而取之曰獲委于朝十日待來識之者人民謂刑人奴隸逃亡者司隸職曰帥其民而搏盜賊鄭司農云若今時得遺物及放失六畜持詣鄉亭縣庭

大者公之大物没入公家也小者私之小物自畀也
玄謂人民之小者未齔七歲以下 疏曰告于士者
得物之人告朝士 俘音孚搏音博齔音視畀必二
反

凡士之治有期日國中一旬郊二旬野三旬都三月邦
國朞期內之治聽期外不聽

註曰鄭司農云謂在期內者聽期外者不聽若今時
徒論決滿三月不得乞鞠 疏曰凡士之治有期日

者即上文鄉士遂士之等獄訟成來於外朝職聽遠近節之皆有一旬二旬期日期內聽期外不聽者所以省煩息訟也

凡有責者有判書以治則聽

註曰判半分而合者鄭司農云謂若今時辭訟有券書者為治之鄭剛中曰責如今之理欠

○凡民同貨財者令以國灋行之犯令者刑罰之

註曰鄭司農云同貨財者謂合錢共賈者也以國灋

行之司市為節以遣之 坡謂國灋如度量淳制及
偽飾之禁也犯令者刑罰之如二人同財一人犯令
則惟刑罰其犯令不相及也然言同貨財則自賈者
亦在其中

○凡屬責者以其地傳而聽其辭

註曰屬責轉責使人歸之而本主死亡歸受之數相
抵冒者也以其地之人相比近能為證者來乃受其
辭為治之

○凡盜賊軍鄉邑及家人殺之無罪

註曰鄭司農云謂盜賊羣輩若軍共攻盜鄉邑及家人者殺之無罪若今時無故入人室宅廬舍上人車船牽引人欲犯灋者其時格殺之無罪 鄭剛中曰軍鄉邑及家人者屯於鄉邑姦犯及家人也

○凡報仇讎者書於士殺之無罪

疏曰士即朝士也 坡謂此謂或孤稚羸弱長成而將復仇者或仇人始逃而今乃歸者或始無如之何

而今乃可復者皆是也註疏意以殺人者會赦不死
乃不辟於遠方猶與所殺之親同國將報之先書於
士妄意唐虞只書災肆赦而此經列有三宥三赦古
所謂赦者如是而已豈有當誅而能會赦乎肆大眚
始見於春秋漢唐方有大赦未可以為斷也 責側
賣反又如字賈音古比毗志反辟音避

若邦凶荒札喪寇戎之故則令邦國都家縣鄙慮刑貶
註曰慮謀也貶猶減也謂當圖謀緩刑且減國用為

民困也所賤視時為多少之灋 疏曰縣鄙謂六遂

不言六鄉者舉遂則鄉在其中

○司民掌登萬民之數自生齒以上皆書於版辨其國中與其都鄙及其郊野異其男女歲登下其死生

註曰登上也男八月女七月而生齒版今戶籍也下

猶去也每歲更著生去死 疏曰國中據六鄉在城

中者都鄙據三等采地及其郊野者郊謂六鄉之民

在四郊者野謂六遂及四等公邑是徧畿內矣 著

丁略反

及三年大比以萬民之數詔司寇司寇及孟冬祀司民
之日獻其數于王王拜受之登于天府內史司會冢宰
貳之以贊王治

註曰司民軒轅角也天府主祖廟之藏者贊佐也三
官以貳佐王治者當以民多少黜陟主民之吏 疏
曰軒轅十七星如龍形有兩角角有大民小民 鄭
剛中曰內史司會冢宰貳之以見民非特王之事而

為大臣者不可不任其責小司寇貳之以制國用此
言貳之以贊王治者司寇刑官也民至於犯罪以其
貧窮而抵冒爾故言制國用意欲使三官知為民富
之術不至使之犯罪也司民掌民數之官耳民之貧
而犯罪非已所得而知也以為民者王所當治民有
登耗則為公卿大臣者當據是數佐王以治之使之
繁庶而已故曰以贊王治

○司刑掌五刑之灋以麗萬民之罪墨罪五百劓罪五

百宮罪五百刑罪五百殺罪五百

註曰墨黥也先刻其面以墨室之劓截其鼻也今東西夷或以墨劓為俗古刑人亡逃者之世類與宮者丈夫則割其勢女子閉於宮中若今宦男女也劓斷足也周改臚作刑殺死刑也書傳曰決闕梁踰城郭而畧盜者其刑臚男女不以義交者其刑宮觸易君命革輿服制度姦宄盜攘傷人者其刑劓非事而事之出入不以道義而誦不祥之辭者其刑墨降畔寇

賊劫畧奪攘擄虔者其刑死此二千五百罪之目畧也其刑書則亡夏刑大辟二百贖辟三百宮辟五百劓墨各千周則變焉所謂刑罰世輕世重者也鄭司農云漢孝文帝十三年除肉刑疏曰文帝所赦肉刑惟墨劓與剕三者其宮刑至隋乃赦劓魚器反剕音月黥其京反贖頻忍反降戶江反擄居兆反若司寇斷獄弊訟則以五刑之灋詔刑罰而以辨罪之輕重

註曰詔刑罰者處其所應不如今律家所署灋矣

○司刺掌三刺三宥三赦之灋以贊司寇聽獄訟

註曰刺殺也訊而有罪則殺之宥寬也赦舍也疏

曰刑有五一者是殺餘皆訊之獨言殺者立官名刺據重而言故也

○壹刺曰訊羣臣再刺曰訊羣吏三刺曰訊萬民

疏曰此三刺之事所施謂斷獄弊訟之時

○壹宥曰不識再宥曰過失三宥曰遺忘

註曰鄭司農云不識謂愚民無所識則宥之過失若
今律過失殺人不坐死玄謂識審也不審若今仇讎
當報甲見乙誠以為甲而殺之者過失若舉刃欲砍
伐而軼中人者遺忘若間帷薄忘有在焉而以兵矢
投射之坡謂不識者僻陋之人未識國灋非下文
生而蠢愚者比過失無心也遺忘者疎狂之夫健忘
者也

○壹赦曰幼弱再赦曰老旄三赦曰蠢愚

註曰瘡愚生而癡騃童昏者鄭司農云幼弱老旄若
今時律今年未滿八歲八十以上非手殺人他皆不
坐 王介甫曰幼而不弱老而不耄愚而非蠢則不
在所赦 坡謂上三宥如今律所謂減等此三赦則
全放之

○以此三灋者求民情斷民中而施上服下服之罪然
後刑殺

王光遠曰以此三灋者求民情斷民中則情盡於內

而辭孚於外矣情重者上服情輕者下服或刑或殺
各得其罪而無疑也 刺七賜反旄耄同憊丑江反
軼待結反軼中丁仲反間讀如間廁之間射食亦反
癡丑之反駭五駭反

○司約掌邦國及萬民之約劑治神之約為上治民之
約次之治地之約次之治功之約次之治器之約次之
治摯之約次之

註曰此六約者諸侯以下至於民皆有焉劑謂券書

也治者理其相抵冒上下之差也 坡謂六約既兼
邦國萬民則治神之約以邦國言之天子郊諸侯社
廟制自諸侯至士各有差至於非其當祀而命之亦
為之約若魯禘郊之類也以民言之所謂庶士庶民
祭於寢也治民之約以邦國言之分鄉以寓軍制邑
以授農各容其民不得為逋逃主也至於非所當有
而授之若分晉以九宗之類者亦為之約以民言之
本註謂征稅遷移仇讎既和是也治地之約以邦國

言之五等封土各有定制不得相侵凌至若魯朝宿之許鄭祭泰山之祊者亦為之約以民言之則閭里版圖田首界比是也治功之約以邦國言之司勲六功是也以民言之司寇上功糾力是也治器之約以邦國言之典命所列國家宮室等之節至若非所用而頒之若魯得用四代之服器者亦為之約以民言之如庶人役車端衰喪車無等之類也治摯之約宗伯之六瑞六摯詳矣鄭剛中曰六者或為上或為次

以事之大小輕重為序也 劑子隨反枋音崩

凡大約劑書於宗彝小約劑書於丹圖

註曰大約劑邦國約也書於宗廟之六彝欲神監焉
小約劑萬民約也丹圖未聞或有彫器簠簋之屬有
圖象者與春秋傳曰斐豹隸也著於丹書今俗語有
鐵券丹書豈此舊典之遺言

○若有訟者則珥而辟藏其不信者服墨刑

註曰訟訟約若宋仲幾辭宰者也辟藏開府視約書

不信不如約也珥讀為衄謂殺雞取血釁其戶

○若大亂則六官辟藏其不信者殺

註曰大亂謂僭約若吳楚之君晉文公請隧以葬者

六官辟藏明罪大也六官初受盟約之貳 珥音二

註衄同辟音闕隧音遂

○司盟掌盟載之灋

註曰載盟辭也盟者書其辭於策殺牲取血坎其牲
加書於上而埋之謂之載書春秋傳曰宋寺人惠牆

伊戾坎用牲加書為世子痤與楚客盟 痤才戈反
凡邦國有疑會同則掌其盟約之載及其禮儀北面詔
明神既盟則貳之

註曰有疑不協也明神之明察者謂日月山川也
覲禮加方明于壇上所以依之也詔之者讀其載書
以告之也貳之者寫副當以授六官

盟萬民之犯命者詛其不信者亦如之

註曰盟詛者欲相與共惡之也犯命犯君教令也不

信違約者也春秋傳曰臧紇犯門斬關以出乃盟臧氏又曰鄭伯使卒出穀行出犬難以詛射穎考叔者

疏曰凡言盟者盟將來詛者詛往過

○凡民之有約劑者其貳在司盟

註曰貳之者檢其自相違約 疏曰此謂司約副寫一通來入司盟檢後相違約勘之

○有獄訟者則使之盟詛

註曰不信則不敢聽此盟詛所以省獄訟 坡謂此

承上文約劑而言 惡烏路反紇恨發反獬音加

凡盟詛各以其地域之衆庶共其牲而致焉既盟則為
司盟共祈酒脯

註曰使其邑閭出牲而來盟已又使出酒脯司盟為
之祈明神使不信者必凶 坡謂此一官見聖人防
民之周夫邦國兆民情偽之出蓋千態萬貌矣邦國
之間或有讒人交構其間小將相惡大將相暴欲以
王瀆正之則彼此各有其是難為輕重欲和之則終

懷猜忌使詔於明神雖有大疑兩亦釋然矣若夫萬
民之獄訟或有情事曖昧無佐証可成其罪欲赦之
則受害者不肯甘心欲罰之則無惡者不服其罪計
惟有盟詛使神人交疾之耳蓋聖人有以見夫逆於
倫而感於氣者必召殃禍使之有所不敢又有以見
夫天理民彝不容泯滅無情者必負羞而畏神使之
有所不忍實善於佐瀆之窮者也况所對者日月山
川之神豈為妖妄乎而或謂先王之世令行禁止安

有誨以不經之事此似是而非可言不可行之論也
嗚呼誓誥不及五帝盟詛不及三王蓋言其盛時耳
聖人之灋豈獨紀一時之宜哉寧使世治民淳灋設
而不用不可使世衰民僞值其事而無灋以處之也
○職金掌凡金玉錫石丹青之戒令

註曰青空青也 疏曰此數種同出於山地官廿人
已主職金又主之者彼官主其取此官主其藏故二
官共主之也

○受其入征者辨其物之嫩惡與其數量揭而璽之入其金錫于為兵器之府入其玉石丹青于守藏之府

註曰為兵器者攻金之工六也守藏者玉府內府也鄭司農云受其入征者謂主受采金玉錫石丹青者之租稅也揭而璽之者揭書其數量以著其物也璽者印也既揭書備其數量又以印封之今時之書有所表識謂之揭璲

○入其要

註曰要凡數也入之於大府 嫩美同榻音竭守音
狩卅音礦掄音牋識音志彘音豬

掌受士之金罰貨罰入于司兵

註曰給治兵及工直也貨泉貝也罰罰贖也書曰金
作贖刑 疏曰古者出金贖罪皆據銅為金士之金
罰者謂斷獄訟者有疑即使出贖既言金罰又曰貨
罰者出罰之家時或無金即出貨以當金直故兩言
之

旅于上帝則共其金版饗諸侯亦如之

註曰餅金謂之版此版所施未聞餅必領反

凡國有大故而用金石則掌其令

註曰主其取之令也用金石者作槍雷椎槁之屬

疏曰大故寇戎也槍七羊反雷郎對反椎直追反

槁音烹

○司厲掌盜賊之任器貨賄辨其物皆有數量賈而楬之入于司兵

註曰鄭司農云任器貨賄謂盜賊所用傷人兵器及所盜財物也入于司兵若今時傷殺人所用兵器盜賊贓加責沒入縣官 疏曰任器多是金刃所盜財貨雖非金刃以其賊物亦入司兵給治兵刃之用故並入司兵也 賈音嫁

其奴男子入于罪隸女子入于舂槩

註曰鄭司農云謂坐為盜賊而為奴者輸于罪隸舂人槩人之官也由是觀之今之為奴婢古之罪人也

故書曰予則奴戮女論語曰箕子為之奴罪隸之奴也故春秋傳曰斐豹隸也著於丹書請焚丹書我殺督戎恥為奴欲焚其籍也玄謂奴從坐而沒入縣官者男女同名

凡有爵者與七十者與未齟者皆不為奴

註曰有爵謂命士以上也齟毀齒也男八歲女七歲而毀齒鄭剛中曰盜賊之罪宜加以無餘刑故凡親戚皆從其家有爵者有老幼者特免為奴而已

易彥祥曰先王之於天下固有殺未足以懲惡亦有
不刑可以勸善者此之謂夫 齟音𪛗

○犬人掌犬牲凡祭祀共犬牲用牲物伏瘞亦如之

註曰鄭司農云牲純也物色也伏謂伏犬以王車轢
之瘞謂埋祭也爾雅曰祭地曰瘞埋

○凡幾珥沈辜用駟可也

註曰鄭司農云幾讀為廐爾雅曰祭山曰廐縣祭川
曰浮沈大宗伯職曰以埋沈祭山林川澤以鬯辜祭

四方百物駝謂不純色也玄謂幾讀為刼耳當為𪔐

刼𪔐者釁禮之事

瘞於例反轢音歷駝亡江反廢

音詭縣音懸

凡相犬牽犬者屬焉掌其政治

註曰相謂視擇知其善惡

疏曰犬有三種一田犬

二吠犬三食犬若田犬吠犬觀其善惡若食犬觀其

肥瘠故皆相之牽犬者謂呈見之故少儀云犬則執

紼是也 紼音僻

○司圜掌收教罷民

鄭剛中曰拘之圜土而役之所以收之也勞之苦之使其善心自生所以教之也

○凡害人者弗使冠飾而加明刑焉任之以事而收教之能改者上罪三年而舍中罪二年而舍下罪一年而舍其不能改而出圜土者殺雖出三年不齒

註曰弗使冠飾者著墨幪若古之象刑與舍釋之也鄭司農云罷民謂惡人不從化為百姓所患苦而未

入五刑者也故曰凡害人者不使冠飾任之以事若
今時罰作矣 罷蒲宜反

凡圜土之刑人也不虧體其罰人也不虧財

註曰言其刑人但加以明刑罰人但任之以事耳圜
土所收教者過失害人已麗於灋者

○掌囚掌守盜賊凡囚者上罪桎梏而桎中罪桎梏下
罪桎王之同族桎有爵者桎以待弊罪

註曰凡囚者謂非盜賊自以他罪拘者也鄭司農云

拳者兩手共一木也桎梏者兩手各一木也玄謂在手曰梏在足曰桎中罪不拳手足各一木耳下罪又去桎王同族及命世以上雖有上罪或拳或桎而已弊猶斷也疏曰此謂五刑罪人古者五刑不入圜土故使身居三木掌囚守之梏古毒反拳音鞏桎之實反

及刑殺告刑于王拳而適朝士加明梏以適市而刑殺之

註曰告刑于王告王以今日當行刑及所刑姓名也
其死罪則曰某之罪在大辟其刑罪則曰某之罪在
小辟拳而適朝者重刑為王欲有所赦則當以付士
士鄉士也鄉士加明梏者謂書其姓名及其罪於梏
而著之也囚時雖有無梏者至於刑殺皆設之以適
市就衆也庶姓無爵者皆刑殺於市 疏曰刑殺各
於本獄之所今此經云以適市者此文止謂六鄉之
獄在國中推問在獄行刑殺則在市若遂士以下自

在本獄之處刑殺之故此云士鄉士也若遂士以下於此時掌囚亦當付士也

○凡有爵者與王之同族等而適甸師氏以待刑殺

註曰適甸師氏亦由朝乃往也待刑殺者掌戮將自市來也文王世子曰雖親不以犯有司正術也所以體異姓也刑于隱者不與國人慮兄弟也

○掌戮掌斬殺賊諜而搏之

註曰斬以鈇鉞若今要斬也殺以刀刃若今棄市也

誅謂姦寇反間者賊與謀罪大者斬之小者殺之搏當為膊諸城上之膊字之誤也膊謂去衣磔之

凡殺其親者焚之殺王之親者辜之

註曰親總服以內也焚燒也易曰焚如死如棄如辜之言枯也謂磔之搏音博註膊同要一遙反

凡殺人者踣諸市肆之三日刑盜于市

註曰踣僵尸也肆猶申也陳也凡言刑盜罪惡莫大焉坡謂殺罪就市其餘四刑宮罪就蠶室餘刑就

屏處所云五刑三就也若盜殺之固在市矣雖刑亦於市則異於平人之犯梟者

○凡罪之麗於灋者亦如之唯王之同族與有爵者殺之于甸師氏

註曰罪二千五百條上附下附刑五而已於刑同科者其刑殺之一也坡謂亦如之者合入死者亦踏之合入四刑者雖不於市亦刑之其處故總言之殺之于甸師氏者謂不踏踏者陳尸使人見之既刑於

隱處故不踣也 踣皮北反僵居良反

凡軍旅田役斬殺刑戮亦如之

註曰戮謂膊焚辜肆

墨者使守門

註曰黥者無妨於禁禦

劓者使守闕

註曰截鼻亦無妨以貌醜遠之

宮者使守內

註曰以其人道絕也今世或然

剛者使守圉

註曰斷足驅衛禽獸無急行

髡者使守積

註曰此出五刑之中而髡者必王之同族不宮者宮之為翦其類髡頭而已守積積在隱者宜也 髡若門反積子賜反

○司隸掌五隸之灋辨其物而掌其政令

註曰五隸謂罪隸四翟之隸也物衣服兵器之屬

帥其民而搏盜賊役國中之辱事為百官積任器凡囚
執人之事

註曰民五隸之民也鄭司農云百官所當任持之器
物此官主為積聚之也玄謂任猶用也疏曰民者
上序官五隸皆百二十員員外皆是民也任器者除
兵之外所有家具之器皆是搏音博

邦有祭祀賓客喪紀之事則役其煩辱之事

註曰煩猶劇也士喪禮下篇曰隸人湔廁 湔乃結

反

掌帥四翟之隸使之皆服其邦之服執其邦之兵守王宮與野舍之厲禁

註曰野舍王行所止舍也厲遮列也 疏曰服其邦之服執其邦之兵者若東方南方衣布帛執刀劍西方北方衣氈裘執弓矢 鄭剛中曰司隸正掌其事而師氏又使其屬董之而已

○罪隸掌役百官府與凡有守者掌使令之小事

註曰役給其小役

○凡封國若家牛助為牽徬

註曰鄭司農云凡封國若家謂建諸侯立大夫家也
牛助為牽徬此官主為送致之也玄謂牛助國以牛
助轉徙也罪隸牽徬之在前曰牽在旁曰徬 疏曰
車轅內一牛前亦一牛今還遣二隸前者牽前牛徬
者御當車之牛故據人而言牽徬也

○其守王宮與其厲禁者如蠻隸之事

徬步浪反

○蠻隸掌役校人養馬其在王宮者執其國之兵以守王宮在野外則守厲禁

疏曰按校人良馬乘一師四圍不見隸者蓋是雜役之中

○閩隸掌役畜養鳥而阜蕃教擾之掌子則取隸焉

坡謂役畜謂為掌畜之役也掌子則取隸者此句當

有闕誤

○夷隸掌役牧人養牛馬與鳥言

註曰鄭司農云夷狄之人或曉鳥獸之言故春秋傳曰介葛廬聞牛鳴曰是生三犧皆用之矣是以貉隸職掌與獸言

○其守王宮者與其守厲禁者如蠻隸之事

○貉隸掌役服不氏而養獸而教擾之掌與獸言

註曰不言阜蕃者猛獸不可服又不生乳於園檻也

○其守王宮者與其守厲禁者如蠻隸之事

乳而樹反圉求阮反檻戶覽反

○布憲掌憲邦之刑禁正月之吉執旌節以宣布于四方而憲邦之刑禁以詰四方邦國及其都鄙達于四海
註曰憲表也謂縣之也刑禁者國之五禁所以左右
刑罰者詰謹也使四方謹行之爾雅曰九夷八蠻六
戎五狄謂之四海 坡謂自執旌節至達於四海皆
一時事言於司寇布刑之日執旌節適四方以宣布

之而表縣其刑禁之書使四方邦國都鄙四海莫不
謹行也 縣音懸

凡邦之大事合衆庶則以刑禁號令

疏曰邦之大事合衆庶者謂征伐巡守田獵皆是大
事合衆庶也

○禁殺戮掌司斬殺戮者凡傷人見血而不以告者攘
獄者過訟者以告而誅之

註曰司猶察也察此四者告於司寇罪之也斬殺戮

謂吏民相斬相殺相戮者傷人見血見血乃為傷人耳坡謂攘猶距也攘獄者灋當獄官有文書追攝攘距不受捕也過訟者過止欲訟者也

○禁暴氏掌禁庶民之亂暴力正者橋誣犯禁者作言語而不信者以告而誅之

註曰民之好為侵陵稱詐謾誕此三者亦刑所禁也力正以力强得正也吳氏曰力正謂脅衆從己以邪為正也橋其表反

凡國聚衆庶則戮其犯禁者以徇凡奚隸聚而出入者則司牧之戮其犯禁者

註曰奚隸女奴男奴也其聚出入有所使 疏曰聚衆庶者謂征伐之等奚隸聚而出入者謂國有煩辱之處使奚隸

○野廬氏掌達國道路至于四畿

註曰達謂巡行通之使不陷絕也去王城五百里曰畿

比國郊及野之道路宿息井樹

註曰比猶較也宿息廬之屬賓客所宿及晝止者也井共飲食樹為蕃蔽疏曰此經所云王為賓客在道須得共丞守衛之事國郊謂近郊遠郊野謂百里外至畿宿謂十里有廬三十里有宿五十里有市直言宿者舉中言之

○若有賓客則令守涂地之人聚櫟之有相翔者誅之註曰守涂地之人道所出廬宿旁民也相翔猶昌翔

觀伺者也鄭司農云聚櫟之聚擊櫟以宿衛之也有
姦人相翔於賓客之側則誅之不得令寇盜賓客

櫟音託

凡道路之舟車輦互者敘而行之

註曰舟車輦互謂於迫隘處也車有輹輹坻閣舟有
砥柱之屬其過之者使以次敘之鄭剛中曰輦者
相值而礙也互者交互而不行也

○凡有節者及有爵者至則為之辟

註曰辟辟行人亦使守涂地者 聲音計輶戶闕反
禁野之橫行徑踰者

註曰皆為防姦也橫行妄由田中徑踰射邪趨疾越
隄渠也 射食亦反

凡國之大事比脩除道路者

註曰比校治道者名若今次金敘大功 疏曰大事
謂若征伐巡守田獵郊祀天地王親行所經並須脩
除道路

○掌凡道禁

註曰禁謂若今絕蒙布巾持兵杖之屬

邦之大師則令埽道路且以幾禁行作不時者不物者

註曰不時謂不夙則莫者也不物謂衣服操持非比
常人也幾禁之者備姦人內賊及反間

○蜡氏掌除飢

註曰曲禮四足死者曰漬飢鄭司農云謂死人骨也
月令曰掩骼埋胔骨之尚有肉者也及禽獸之骨皆

是 坡謂骹有掩埋而無除去此除骹二字各自為義蓋除一事也骹一事也下文自明詳之 蜡音娶
骹似賜反註漬醢皆同骹古百反

凡國之大祭祀令州里除不蠲禁刑者任人及凶服者
以及郊野大師大賓客亦如之

註曰蠲讀如潔圭惟饒之圭圭潔也刑者黥劓之屬
任人司圜所收教罷民也凶服服衰經也此所禁除
者皆為不欲見人所歲惡也 疏曰大祭祀謂郊祭

天地大賓客謂諸侯來朝若據天地其神位在郊至郊而已若賓客則至畿故兼言野郊外曰野大總言也 坡謂此一節言掌其除之事也 蠲古懸反饅

昌志反藏穢同惡烏路反

若有死於道路者則令埋而置楬焉書其日月焉縣其衣服任器于有地之官以待其人

註曰有地之官主此地之吏也其人家人也鄭司農云楬欲令其識取之今時楬藥是也有地之官有郡

界之吏今時鄉亭是也

○掌凡國之酖禁

註曰禁謂孟春掩骼埋胔之屬 坡謂此二節言掌

其酖之事也 揭音竭縣音懸

○雍氏掌溝瀆澮池之禁凡害於國稼者春令為阱獲
溝瀆之利於民者秋令塞阱杜獲

註曰溝瀆澮田間通水者也池謂陂障之水道也害
於國稼謂水潦及禽獸也阱穿地為壩所以禦禽獸

其或超踰則陷焉世謂之陷阱獲柞鄂也堅地阱淺則設柞鄂於其中秋而杜塞阱獲收刈之時為其陷害人也書柴誓曰敵乃獲斂乃阱時秋也伯禽以出師征徐戎獲胡化反陂披宜反壻七艷反柞才伯反鄂五格反柴音秘敵音杜斂乃協反

禁山之為苑澤之沈者

註曰為其就禽獸魚鼈自然之居而害之鄭司農云不得擅為苑囿於山也澤之沈者謂毒魚及水蟲之

屬

○萍氏掌國之水禁

註曰水禁謂水中害人之處及入水捕魚鼈不時

○幾酒

註曰苛察沽買過多及非時者

○謹酒

註曰使民節用酒也書酒誥曰有政有事無彝酒
黃文叔曰掌水禁而使禁酒酒亦水之害人者也

○禁川游者

註曰備波洋卒至沈溺也

○司寤氏掌夜時

註曰夜時謂夜早晚若今甲乙至戊

○以星分夜以詔夜士夜禁

註曰夜士主行夜徼候者如今都候之屬 易彥祥

曰此謂施於國中者蓋國中有啓閉之候國事有朝夕之禮以星分夜則星見為夜星沒為晝朝夕啓閉

於是乎在以是詔夜守之士

○禦農行者禁宵行者夜游者

註曰備其遭寇害及謀非公事禦亦禁也謂遏止之
無刑灋也晨先明也宵定昏也書曰宵中星虛春秋
傳曰夜中星隕如雨 微古弔反先悉薦反

○司烜氏掌以夫遂取明火於日以鑒取明水於月

註曰夫遂陽遂也鑒鏡屬取水者世謂之方諸取日
之火月之水欲得陰陽之潔氣也 鄭剛中曰或謂

鑒遂之齊同用金錫之半可以取水亦可以取火何也蓋金錫半者陰陽之雜用諸晝則陽氣應之而為火用諸夜則陰氣應之而為水

○以共祭祀之明齋明燭共明水

註曰明燭以照饌陳明水以為玄酒鄭司農云夫發聲明齋謂以明水脩滌染盛黍稷 疏曰鬱鬯五齊

以明水配三酒以玄酒配玄酒井水也與明水別然對則異散文通謂之玄酒 烜音燬夫如字司農音

符

凡邦之大事共墳燭庭燎

註曰故書墳為蕢鄭司農云蕢燭麻燭也玄謂墳大也樹於門外曰大燭於門內曰庭燎皆所以照衆為明 疏曰大事者謂若大喪紀大賓客 墳扶云反 註蕢同燎音聊

中春以木鐸修火禁于國中

註曰為季春將出火也火禁謂用火之處及備風燥

○軍旅修火禁邦若屋誅則為明竈焉

註曰屋讀如其形劉之劉劉誅謂所殺不於市而以適甸師氏者也明竈若今揭頭明書其罪灋也司烜掌明竈則罪人夜葬與坡謂屋誅為明竈者蓋凡殺人皆肆之三日明暴其罪今殺于甸師者因不肆諸市壙埋之揭其罪於竈上中音仲竈昌銳反劉音握

○條狼氏掌執鞭以趨辟王出入則八人夾道公則六

人侯伯則四人子男則二人

註曰趨辟趨而辟行人若今卒辟車之為也孔子曰
富而可求雖執鞭之士吾亦為之言士之賤也 疏
曰案序官條狼氏下士六人今云天子八人少二人
矣蓋取胥徒中兼充也 條音滌辟音闕

凡誓執鞭以趨於前且命之誓僕右曰殺誓馭曰車轅
誓大夫曰敢不闕鞭五百誓師曰三百誓邦之大史曰
殺誓小史曰墨

註曰前謂所誓衆之行前也有司讀誓辭則大言其
刑以警所誓也誓者謂出軍及將祭祀時也出軍之
誓誓左右及馭則書之甘誓備矣郊特牲說祭祀之
誓曰卜之日王立于澤親聽誓命受教諫之義也車
輶謂車裂也師樂師也大史小史主禮事者鄭司農
云誓大夫曰敢不闕謂不闕於君也玄謂大夫自受
命以出則其餘事莫不復請 疏曰誓自有大官若
月令田獵司徒北面誓之誓時此條狼氏為之大言

使衆聞知故云且命之 輟戶串反一音環大音泰
○脩閭氏掌比國中宿互櫟者與其國粥而比其追胥
者而賞罰之

註曰國中城中也粥養也國所游養謂羨卒也追逐
寇也胥讀為脩鄭司農云宿謂宿衛也互謂行馬所
以障互禁止人也櫟謂行夜擊櫟 粥音育脩音胥

禁徑踰者與以兵革趨行者與馳騁於國中者

註曰皆為其惑衆 徐氏曰且疑其奸非也

邦有故則令守其閭互惟執節者不幾

註曰令者令其閭內之閭胥里宰之屬 疏曰有故
謂大喪寇戎等恐有姦非則命各守閭閭巷門 坡
謂互亦如桎梏之桎

周禮述註卷二十一